

## Шунмгъа тракторист

Сарул тег байсдж  
Санамр сӕӕхн мануртв,  
Сунягъад кӕлӕн джиигъӕд,  
Сергӕд ногъан кӕкрв.  
Байрин джиргълӕр буслгсн  
Багъчудас бӕрдсн бригад  
Хаврин тӕрӕ тӕрлгънд  
Хамцдж дегц гарв.  
Тег дунд товрутсн,  
Тракторин дуд лугшв,  
Эмнг газрин кӕрсиг  
Ӕрстнӕ керчдж сиичв.  
Урлданд довтлсн кӕлгӕдшнӕ  
Угзрад-угзрад кӕгдлнӕ,  
Долан трактор зерглӕд

Дахлдн кӕӕлдӕд цувлдн.  
Дотад халхд йовсн  
Дордж генткн сӕрӕлкӕд,  
— Дӕрлдтн, уӕрмӕд!—гидж  
Дурта тракторан залв.  
Дорджин дуудсн дуудвр  
Дӕрвн уӕгтӕн нисв,  
Бас кесг бригадт  
Багъчудт уӕлгӕр болв.  
Дӕрлдӕнӕ кӕтлвр болгсн  
Дорджин тракторин бригад  
Долан хонг ӕмн  
Дуусдж кӕдлмшӕн чилӕв.

**ДЖЕКИН Чонкш.**